

20 APR 2003

Muhyiddin-Umno

ANGGOTA UMNO DIGESA SELESAIKAN MASALAH DALAMAN DENGAN SENDIRI

KUALA LUMPUR, 20 April (Bernama) -- Anggota Umno digesa menyelesaikan segala permasalahan dalaman parti di semua peringkat bahagian dengan sendiri bagi menjaga kedudukan dan kekuatan parti.

Naib Presiden Umno, Tan Sri Muhyiddin Yassin berkata anggota parti akan dianggap berlaku tidak adil kepada Presiden Umno, Datuk Seri Dr Mahathir Mohamad dan Timbalan Presiden, Datuk Seri Abdullah Ahmad Badawi sekiranya semua masalah yang timbul kemudiannya diserahkan kepada mereka berdua untuk diselesaikan.

Muhyiddin menambah pemimpin negara ini mempunyai tanggungjawab yang lebih berat lagi untuk memimpin negara, maka dengan itu adalah penting bagi anggota Umno berbincang untuk mencari penyelesaian kepada semua permasalahan tanpa menunggu pucuk pimpinan parti menyelesaikannya untuk mereka.

"Jangan biarkan kelemahan yang terdapat dalam parti menggugat tugas kita. Kita juga perlu ikhlas dengan diri kita sendiri untuk duduk berbincang dan selesaikan masalah yang ada," katanya semasa berucap merasmikan Persidangan Tahunan Ke-Sembilan Umno Bahagian Wangsa Maju di sini hari ini.

Katanya penyelesaian masalah itu penting bagi memastikan Umno kekal hidup untuk mempertahankan negara.

Beliau berkata kesedaran untuk mempertahankan negara perlu ditingkatkan memandangkan dunia sekarang berhadapan dengan situasi politik antarabangsa yang tidak menentu.

Muhyiddin yang juga Menteri Perdagangan Dalam Negeri dan Hal Ehwal Pengguna berkata anggota Umno perlu menjadikan pencerobohan ke atas Iraq sebagai suatu amaran yang mana negara di seluruh dunia sekarang ini sedang bergerak dalam persekitaran yang merbahaya.

Katanya program-program patriotisme yang sering diadakan di dalam parti perlu diperhebatkan bukan sahaja kepada anggota Umno, tetapi juga kepada masyarakat keseluruhannya.

"Yang penting bagi kita adalah membina ketahanan diri dan kekuatan minda. Walaupun sekarang bangsa Melayu sudah maju, tetapi masih ada kelemahan," katanya.

Beliau berkata adalah penting untuk anggota Umno menganalisis segala permasalahan dengan bijak dengan mengetepikan kepentingan sendiri dalam parti.

-- BERNAMA

NN KHY ZB